

Dogri Evening (NSD)

22-07-2026

खबरां

1. बक्ख-बक्ख मुद्दे पर विपक्ष दे बरोध दे चलदे संसद दिन भरै लेई स्थगित।
2. भारती नोसेना नै समुंद्री सुरक्षा गी मजबूत करने लेई दुआ पनडुब्बी रोधी युद्धपोत आई.एन.एस मालवन शामिल कीता।
3. राष्ट्रपति द्रौपदी मुर्मू होरें अज्ज उत्तरी मैसेडोनिया दी अपनी राजकीय जात्तरा दरान स्कोप्जे शेहर दे संग्रहालय च महात्मा गांधी हुंदी प्रतिमा दा परदा गोआड़ेआ।
4. क्वाड दे विदेश मंत्रियों नै स्वतंत्र, खुल्ले ते समावेशी इंडो-पैसेफिक दे प्रति प्रतिबद्धता दी पुष्टि कीती।
5. दिल्ली मेट्रो रेल कार्पोरेशन दे मताबक 16 मेट्रो स्टेशन अगले निर्देश तगर बंद रौहडन।
6. गुजरात, मध्य महाराष्ट्र ते गोवा दे किश हिस्सें च अगले दो दिनें धोड़ी भारी बरखा दी शैका दे चलदे रेड अलर्ट जारी कीता गेआ ऐ।

<><><><><><>

EVE-LSRS-Adjourned

संसद दे दौनें सदनें दी कार्यवाही नीट परीक्षा दे पेपर लीक मामले गी लेइयै बरोध प्रदर्शन ते होरनें मुद्दे पर विपक्षी दलें दे बरोध दे बाद दिन भरै लेई स्थगित करी दित्ती गई। लोकसभा दी कार्यवाही दपैहरी दो बजे दुई बारी स्थगन दे बाद फही शुरू होई तां विपक्ष नै नीट मुद्दे पर दोबारा नारेबाजी शुरू करी दित्ती। हंगामे दे चलदे सदन नै तृणमूल कांग्रेस दे सांसद कल्याण बेनर्जी गी मानसून सत्र दे शेष समें लेई निलंबित करने दा प्रस्ताव पारित कीता। पीठासीन अधिकारी कृष्ण प्रसाद टेनेरी होरें आखेआ जे कल्याण बेनर्जी होरें महिला सांसदें गी निशाना बनांदे होई आपत्तिजनक ते असंसदीय टिप्पणी कीती जिस करी औपचारिक रूपै नै अध्यक्ष हुंदे संज्ञान च लैता गेआ। उनें इस घटना गी आपत्तिजनक ते सदन दी गरिमा ते मर्यादा दे विरुद्ध दस्सेआ। राज्यसभा च बी इस्सै चाल्ली दी स्थिति दिक्खने गी थ्होई।

<><><><><><>

Sikkim-Tunnel

सिक्किम दे नामची जिले दे समरदुंग स्थित सुरंग च बचाव दल नै 8 होर लोथां बरामद कीतिआं न। हालांकि खराब मौसम करी बचाव दल गी लोथां कडुने च मुश्कल होआ'रदी ऐ। अधिकारिएं मूजब घट्ट नजरी औने ते मीथेन गैस दे रिसाब कन्नै बचाव अभियान गी होर मुश्कल बनाई दित्ता ऐ। राश्ट्री आपदा मोचन बल, राज्य आपदा मोचन बल, सिक्किम पुलस ते खनन माहिरे दे बचाव दल नै सुरंग थवां पानी कडुआ। अजें तगर 13 लोथें गी बरामद कीता गेआ ऐ। राज्यपाल ओम प्रकाश माथुर ते मुखमन्त्री प्रेम सिंह तमांग होरें घटना आहली थाहर दा दौरा लाया।

<><><><><><>

INS-Commissioned

भारती नौसेना नै अज्ज कर्नाटक दे कारवार आई.एन.एस कादंबा नौसेना बेस पर माहे श्रेणी दे दुए पनडुब्बी रोधी युद्धपोत आई.एन.एस मालवन गी बेडत्रे च शामिल कीता। इस समारोह च वायु सेना प्रमुख एयर चीफ मार्शल ए.पी सिंह, मुख परौहने हे। इस मौके पर पच्छमी नौसेना कमान दे फ्लैग आफिसर कमांडिंग इन चीफ वाइस एडमिरल संजय वत्सयन, कोचीन शिपयार्ड लिमिटेड दे प्रतिनिधि, नौसेना दे वरिष्ठ अधिकारी ते होरनें परौहने उपस्थित हे। आईएनएस मालवन 8 पनडुब्बी रोधी युद्धपोतें चा दुआ युद्धपोत ऐ। इस च 80 फीसद शा मते स्वदेशी उपकरण ते तकनीक दा उपयोग कीता गेआ ऐ।

<><><><><><>

Prez. North Macedonia

राश्ट्रपति द्रौपदी मुर्मू होरें उत्तरी मैसेडोनिया दी अपनी राजकीय जात्तरा दरान अज्ज स्कोपजे शैहर दे संग्रहालय च महात्मा गांधी हुंदी प्रतिमा दा परदा गोआड़ेआ। सभा गी संबोधित करदे होई उनें आखेआ जे महात्मा गांधी भारत दे हे, मगरा सत्य ते अहिंसा दा उंदा संदेश समस्त मानवता दा ऐ। राश्ट्रपति द्रौपदी मुर्मू होरें आखेआ जे संघर्ष असहिष्णुता ते विभाजन थमां लड़ा'रदी दुनिया च गांधी जी दे संवद, करूणा ते शांतिपूर्ण सह अस्तित्व दे आदर्श अत्यंत प्रसांगिक बने दे न।

<><><><><><>

EAM-Quad

विदेश मंत्री डा. एस जयशंकर होर अज्ज फिलीपीन्स दे मनीला च आयोजित क्वाड मंत्रियों दी बैठक च शामिल होए। इक संयुक्त वक्तव्य च भारत, जपान, आस्ट्रेलिया ते अमरीका नै इक स्वतंत्र ते खुल्ले हिंद प्रशांत क्षेत्र गी मजबूत करने दी प्रतिबद्धता ते आसियान दी एकता ते केंद्रीयता लेई अपने अटूट समर्थन दी पुष्टि कीती। बैठक दरान उनें हिंद प्रशांत पर आसियान दे दृष्टिकोण दा समर्थन करने लेई खेत्रीय चुनौतियों ते मौकें पर ध्यान केंद्रित कीता। चर्चा च समुंद्री ते अंतरराष्ट्री सुरक्षा, आर्थिक समृद्धि, महत्वपूर्ण ते उभरती प्रौद्योगिकियों ते आपातकालीन प्रतिक्रिया शामिल कीती गई। क्वाड दे विदेश मंत्रियों इस गल्लै पर सहमति जताई जे हिंद प्रशांत समुंद्री क्षेत्र च शांति ते स्थिरता इस क्षेत्र दी सुरक्षा ते समृद्धि दा आधार ऐ। विदेश मंत्री होरें आस्ट्रेलिया दी विदेश मंत्री पेनी वॉंग हुंदे नै मलाटी कीती। डा. जयशंकर होरें आखेआ जे प्रधानमंत्री नरेंद्र मोदी हुंदी हाल च गै आस्ट्रेलिया जातरा दे परिणामें पर तक्क रक्खी।

<><><><><><>

EAM-ASEAN

विदेश मंत्री डा. एस जयशंकर होरें आखेआ जे उथल-पुथल ते रूकावटें दे इस दौर च सबनें शा मता असर आपूर्ति श्रृंखला उप्पर पेआ ऐ। फिलीपीन्स दे मनीला च अज्ज आसियान मंत्री स्तरीय सम्मेलन च श्री जयशंकर होरें आखेआ जे उर्जा खाद्य ते स्वास्थ्य सुरक्षा गी होर मते समें धोड़ी हल्के च नेई लैता जाई सकदा। उनें आखेआ जे भारत ते आसियान देश अपने भविष्य दे प्रति आशावादी न ते इसै लेई चुनौतिएं दा सामना करदे होई मौकें पर ध्यान केंद्रित करना लोड़चदां डा. जयशंकर होरें आखेआ जे एह बरा आसियान-भारत समुंद्री सहयोग बरा ऐ। एह चेता दुआने दा मौका ऐ जे भारत ते आसियान देशे मते स्थिर ते सुरक्षित भविष्य दी बक्खी प्रगति लेई रलियै प्रयास करी सकदे न।

<><><><><><>

Rajnath-Samundra Pradakshina

रक्षा मंत्री राजनाथ सिंह होरें आखेआ जे आई.ए.एस.वी त्रिवेणी पर सुआर होइये पैहली बारी सबै सेनाएं दी महिला सदस्यता समुंद्री अभियान समुद्र प्रदक्षिणा नै ना शड़ा पृथ्वी दा चक्कर लाया बल्कि इस असाधारण उपलब्धि करी करोड़ें भारतीयें गी गौरवांवित बी कीता। उनें आई.ए.एस.वी त्रिवेणी पर सोआर होइयै समुद्र प्रदक्षिणा अभियान गी वर्चुअल रूप कन्नै रवाना कीता। चालक दल दी राजनयिक जातराएं दा जिक्र करदे होई श्री सिंह होरें आखेआ जे उनें भारत दी संस्कृति ते लोकतांत्रिक मूल्यें दे राजदूत दे रूपै च कम्म कीता जिस करी देश दी साफ्ट पावर मजबूत होई।

Delhi-Metro

दिल्ली मेट्रो रेल कार्पोरेशन नै दस्सेआ जे सुरक्षा कारणें करी दिल्ली दे 16 मेट्रो स्टेशन अगले आदेश धोड़ी बंद रौहंगन। बंद कीते गेदे स्टेशनें च लोक कल्याण मार्ग, राजीव चौक, पटेल चौक, रामाकृष्ण आश्रम मार्ग, बाराखम्भा रोड, सुप्रीम कोर्ट, सेवा तीर्थ, जनपथ, मंडी हाउस, सेंट्रल सेक्टरेट, आई.टी.ओ, दिल्ली गेट, इंद्रप्रस्त, खान मार्केट, जोर बाग ते शिवाजी स्टेडियम शामिल ऐ।

<><><><><><>

Govt. Vande Bharat

सरकार नै दस्सेआ ऐ जे देश भर च कोई 162 वंदे भात रेल सेवा चला'रदियां न। अज्ज लोकसभा च इक सुआल दे लिखित परते च रेल मंत्री अश्विनी वैश्वणव होरें आखेआ जे रेलवे नै जात्तरा सुगम बनाने लेई स्वदेशी रूपै नै डिजाइन ते निर्मित वंदे भारत रेल गड्डियां शुरू कीतियां न।

<><><><><><>

BJP-LoP

भारती जनता पार्टी नै विपक्ष दे नेता राहुल गांधी हुंदे आसेआ कल प्रधानमंत्री आवास दे गेट दे बाहर विजन अनुमति दे धरने पर बैठने दी कड़ी निंदेआ कीती। नमीं दिल्ली च मीडिया कन्नै गल्ल करदे होई बीजेपी सांसद रविशंकर प्रसाद होरें इसी भारत दे लोकतंत्र दे इतिहास च इक शर्मनाक ध्याड़ा दस्सेआ। उनें आखेआ जे प्रधानमंत्री आवास दी गरिमा गी जानदे होई बी श्री गांधी होरें गैर जिम्मेदाराना बवहार कीता। बीजेपी सांसद नै सुरक्षा प्रोटोकाल दे महत्व पर जोर दिंदे होई आखेआ जे प्रधानमंत्री हुंदी सुरक्षा सर्वोपरि ऐ।

<><><><><><>

IMD-Weather

मौसम विभाग नै गुजरात दे मते सारे हिस्से, महाराष्ट्र, कोंकण ते गोवा दे हिस्सें च भारी थमां मती भारी बरखा पौने सरबंधी रेड कलर चेतावनी जारी कीती ऐ। मौसम विभाग मूजब जम्मू ते कश्मीर, लद्दाख, हिमाचल प्रदेश, पंजाब, पूर्वी राजस्थान, मध्य प्रदेश, छत्तीसगढ़, ओडिशा ते विदर्भ च अगले दो थमां त्रै दिनें दरान भारी थमां मती भारी बरखा पौने दा इमकान ऐ।

LG- Terror Attack

जम्मू-कश्मीर दे उपराज्यपाल मनोज सिन्हा होरें अनंतनाग च होए दे आतंकवादी हमले दी सख्त लफ्तें च निंदेआ कीती ते आखेआ जे हमले लेई जिम्मेदार लोकें गी पक्क गै कनून तैहत सजा दिती जाह्ग। उनें आखेआ जे उनें डी.जी.पी नलिन प्रभात हुं'दे कन्नै गल्ल करियै सुरक्षा हालात दा जायजा लैता। हेड कांस्टेबल आशिक हुसैन कुरैशी दे परौआर आहलें प्रति उनें अपनियां संवेदना जाहिर कीतिआं न। आशिक हुसैन नै अपनी ड्यूटी गी अंजाम दिंदे होई अपनी जिंदू दा बलिदान दित्ता। उपराज्यपाल होरें आखेआ जे पूरा मुख्य शहीद दे परौआर आहले कन्नै ऐ। उनें आखेआ जे जम्मू-कश्मीर पुलस ते सुरक्षाबल पूरी कोशश करा'रदे न तां जे साजिश गी अंजाम देने आहलें गी सजा दिती जाई सकै।

<><><><><><>

Security Beefed Up

अनंतनाग च पुलस पार्टी पर आतंकवादिएं आसेआ कीती गेदी गोलीबारी मगरा सुरक्षा बवस्था निगगर करी दिती गेई ऐ। इस गोलीबारी च इक पुलस कर्मी शहीद होई गेआ ऐ। घटना मगरा इलाके च सुरक्षाबलें आसेआ व्यापक तपाशी अभियान चलाया गेआ ऐ तां जे हमलावरें गी फगड़ेआ जाई सकै। बाददू सुरक्षाबलें गी तैनात कीता गेआ ऐ ते नोकें गी बी सतर्क कीता गेआ ऐ। पुलस ते होर दुइयां सुरक्षा एजेंसियां हमले दी जांच करा'रदियां न तां जे हमलावरें गी फगड़ेआ जाई सकै। इलाके च तपाशी अभियान जारी ऐ ते होर ब्यौरे गी बलगेआ जा'रदा ऐ।

<><><><><><>